



大清穆宗繼天開運受中居正保大定功聖智誠孝信敏恭寬  
毅皇帝實錄卷之一百五十四

同治四年乙丑九月癸酉諭內閣萬青藜下寶第奏拏獲著名盜首請旨即行正法一摺馬賊王景澂逃匿順天香河縣屬之渠口鎮廟內經署香河縣知縣周紹達等拏獲該犯劫案累累實屬著名渠魁著即行正法梟示傳首犯事地方以昭炯戒另片奏拏獲竄擾寶坻之馬賊白泳才請照奏定章程懲辦等語白泳才騎馬持械搶劫多案實屬目無法紀著一併即行正法梟示○諭軍機大臣等工程處奏廣東粵海關及河南省積欠工程餉銀請飭該督撫監督飛速撥解一

摺現在

定陵順水峪工程雖已告竣尚有欠放之款且禮部內務府八旗營房等工業經開工興修該衙門於本年六月間曾經奏催均未據該省關定期撥解似此延緩誠恐有誤要需著瑞麟郭嵩燾師曾將粵海關欠解工程餉銀十五萬兩吳昌壽將河南省欠解工程餉銀十萬兩按照前次奏定章程移緩就急依限籌解儻再仍前玩泄卽著該衙門照例從嚴叅辦以重要工將此由五百里諭知瑞麟吳昌壽郭嵩燾並傳諭師曾知之○又諭順天府奏擒獲馬賊供出首夥各犯請飭盛京將軍等一體嚴拏等語據寶坻縣擒獲馬賊白泳才供

稱隨同賊首劉五巴等糾夥一百五六十人竄進喜峰口該匪在寶坻縣被官兵拏獲並供出首夥賊犯多名亟應合力摽捕按名緝獲以靖地方著恩合麒麟劉長佑按照單開各犯之姓名住址選派員弁兵役一體嚴密查拏務獲究辦毋任一名漏網原單著鈔給閱看將此各諭令知之○又諭官文等奏官軍乘勝進徇連破賊寨大獲勝仗一摺與吳昌壽昨日所奏情形大略相同著官文吳昌壽鄭敦謹懍遵昨日寄諭飭姜玉順張曜等乘勝進攻將敗竄唐縣泌陽之賊節節掃除毋任再有竄逸河南地方為四通衢該逆雖受大創而黨與仍多此勦彼竄是其慣技曾國藩在徐州東股任

柱等逆未滅。兵力難分。且於豫楚之交界。亦屬鞭長莫及。鮑超新募楚勇數營。前有旨令赴江粵勦賊。歸左宗棠調遣。現在鎮平賊勢已孤。該處有江西廣東福建三省兵力合勦。不難剋日殄除。著官文鄭敦謹傳知鮑超。如已募勇起程。卽飭迅速前進。如尚未起程。卽毋庸赴粵。將所募勇丁帶赴豫南。由裕州泌陽一路勦賊。姜玉順等軍均歸其調遣。仍聽曾國藩節制。以一事權。餉項由楚省解濟。毋令缺乏。如粵省軍務漸竣。仍准將婁雲慶等軍調回。用資得力。將此由六百里諭知官文曾國藩吳昌壽鄭敦謹。並傳諭鮑超知之。○直隸按察使李鶴年奏督辦畿南防務。現飭在防各軍嚴密堵扼。得

旨著隨時嚴飭在防將士加意堵扼。毋稍疏懈。如果防務緊急。卽著該臬司奏明親往督辦。以昭慎重。○以疏防隄工革湖北知縣徐暢達職。○予河南桐河陣亡總兵官羅應貴祭葬。世職加等。於死事地方暨原籍各建專祠。○予山東泰安等處陣亡殉難紳團婦女七千八百七十八名口分別旌卹。如例。○蠲緩山東嘉祥博興濟甯利津滋陽曲阜甯陽鄒滕嶧汶上荷澤城武曹定陶鉅野鄆城郟城金鄉魚臺歷城二十二州縣暨東昌臨清濟甯三衛被災被擾地方新舊額賦。並倉漕竈地銀兩。○甲戌諭內閣吏部奏開復知府可否仍戴原賞翎支一摺。據稱定例革職人員不准戴用原翎。如因

實錄卷一百五十四  
三  
本案開復仍准戴用。茲花翎知府高振洛前因不能附和田興恕辦理釐穀。經田興恕奏參革職。嗣經貴州巡撫張亮基查明。奏請開復原官。惟原奏內未將本案另案開復之處。分晰聲敘。可否仍准戴用原翎。請旨飭遵等語。高振洛參款既屬情有可原。其開復原官。自應照本案開復辦理。著准其仍戴原賞花翎。以符定制。近來降調革職人員。往往因未奉拔去翎支諭旨。託詞戴用。其另案開復各員。亦或恃無不准戴用原賞翎支明文。輒圖蒙混。殊屬非是。嗣後因事降調之員。未奉旨拔去翎支者。除一品至五品仍准戴用外。大員降至六品以下。以及革職各員。一概不准戴用。其開復原官者。必

須本案開復。或奉特旨賞還。及續有軍功。經大臣督撫奏請開復翎支。方准照常戴用。儻因另案開復。或捐復原官。仍不准冒昧戴用。以昭體制。而杜徼幸。○諭軍機大臣等。瑞麟等奏。會勦鎮平逆匪。康逆率黨竄出一摺。康逆困守鎮平。自花旗投誠後。其勢日孤。經方耀等分路進攻。又經江閩各軍會合追截。該逆馬隊數千。突向新鋪一帶奔竄。鎮平縣城旋即收復。逃竄之賊。沿途被官軍節節追殺。精銳漸就散亡。正宜乘其潰敗之際。奮力痛勦。將全股悉數殲滅。以除後患。現在席寶田已向長潭東石迎頭擊賊。其石正大柘及樓車等處。亦有康國器、高連陞、黃少春等。各督閩兵分路追截。即著左

宗棠劉坤○嚴飭各軍遇賊卽擊務須合力痛殲埽除淨盡  
不得以賊勢已窮稍涉大意石正樓車地方與江西接壤劉  
坤一仍當督飭江省防邊各軍慎圖防維毋令逸氛闖入江  
楚徐宗幹亦當飭閩邊防兵一體嚴備以資堵遏粵省方耀  
鄭紹忠兩軍現已隨賊所向盡力窮追李福泰移赴龍川相  
機勦辦任星元等嚴守南雄等處布置尚屬周密著瑞麟郭  
嵩燾等迅飭該員等乘勝追殺不准一名漏網毋令死灰復  
然貽患後日將此由六百里各諭令知之○以江西義甯等  
處勦匪出力賞知州暴大儒守備江清等花翎布政司理問  
鄧相鳳等藍翎餘升敘開復有差○予江西各屬陣亡殉難

訓導傅乃德等紳民婦女六百九十五員名口分別旌卹如  
例○旬到江西湖廣山東情實罪犯停決湖廣絞犯二人山  
東斬犯一人絞犯一人餘五十四人予○賞五城貧民棉  
衣銀○乙亥諭軍機大臣等長善奏揀派馬隊槍隊馳赴冷  
口防哨並臨榆北面綠營所轄殊覺空虛等語該副都統所  
派槍兵八十餘名會同冷口旗兵嚴守關門馬隊兵五十餘  
名梭巡各口與提標兵山永協兵會哨之處著卽飭令帶兵  
佐領扎普善等實力巡查毋得虛應故事有名無實其臨榆  
以北沿邊空虛山永協副將回任需時遊擊音登額巡防東  
路與山海關迤北各口不免隔絕等情已諭知劉長佑揀派

寶錄卷一百五十四  
五  
妥員籌添綠營兵力。互相巡緝。以期周備。該副都統卽飭旗營各員弁會合認真巡哨。毋稍疏虞。將此諭令知之。○又諭閻敬銘奏匪擾定陶。扼勦獲勝。現仍退踞荷澤。曹定之交。連日派軍進勦。並籌布東防。河防各情形一摺。逆匪蓄意東趨。並未大受懲創。現在逆衆數萬。盤旋荷定之界。蓄謀甚狡。潘鼎新一軍。已由鉅野移赴荷澤。著曾國藩卽檄催前進。與前派入東之馬步各隊會合夾擊。毋任東竄。山東兵力甚單。冉垌黃鎮兩軍。閻敬銘務當嚴飭楊飛熊等。激勵兵弁。相機合擊。毋稍退縮。濮范一帶。卽責成衛榮光督率兵勇民團布置。趙三元等礮船。著閻敬銘催令挽入黃河。與原駐黃河之礮

船會同直隸礮船分段布置。以期周密。賊匪逼近東明開州等處。防務緊要。著劉長佑檄飭李鶴年督飭兵弁認真防範。毋稍大意。另片奏密陳山東梟匪多屬回民。鹽匪販私求食。與寇盜不同。緩治之則散。急治之則亂。宜責在官吏。不諉之巡商。宜擒其渠魁。以解餘黨。宜購覓眼綫。以梟治梟。宜以兵為鎮壓。不以兵為捕治。現飭署武定府知府張鼎輔將拒捕首犯密拏懲辦等語。梟匪肆行。若不嚴為捕治。必至貽患將來。該撫惟當不動聲色。擒其渠魁。斷不可姑息養奸。釀成巨患。俟東路賊匪肅清。仍當認真籌辦。本日據長善奏臨榆以北沿邊各口。殊覺空虛等語。著劉長佑揀派幹員籌添兵力。

責成綠營員弁於臨榆以北所轄地面實力梭巡與旗營弁  
兵互相偵緝以期周備毋稍曠誤將此由五百里各諭令知  
之○又諭楊能格奏固原前敵潰營現經設法安撫添籌接  
濟並請留郭炳南募勇兩營各摺片據奏雷正綰當兵勇潰  
變卽飛騎追趕並斬沿途搶奪勇丁十餘名及抵涇州雷正  
綰復連日泣諭又得周顯承鎮靜防堵且見何成蛟等被拏  
伏法該營勇始各感畏陸續折回固原等語覽楊能格先後  
所奏情形是雷正綰所部潰變非不力為彈壓實因呼應不  
靈所致該提督並無甘心叛逆情事與德興阿劉蓉聯捷所  
奏迥不相符著都興阿穆圖善楊岳斌確切查明將雷正綰

兵變實在情形迅速具奏並著劉蓉將前奏因何不符之處  
據實奏聞都興阿等如查明雷正綰尚非意存跋扈卽著向  
該提督剴切開導令其會同魏添應安撫士卒重整部伍奮  
勉圖功以贖前愆一面將該營為首倡亂之勇丁訊明正法  
以昭炯戒楊能格現擬將河東報解在途之餉銀三萬兩全  
數截留徑解涇州糧臺並飭安化縣將日運麪斤加倍添撥  
接濟卽著照所請行並著加意勸勉拊循以弭變故都司郭  
炳南募勇兩營因不及遣散赴楊能格營投效卽著准其留  
營揀派得力營官統帶訓練扼要駐紮以資攻勦將此由六  
百里諭知都興阿穆圖善楊岳斌劉蓉並傳諭楊能格知之

○山海關副都統長善奏遵旨緝獲馬賊趙承汶二犯得旨未獲之曹填各犯仍著督飭各該員弁管帶兵役嚴密訪拏務獲懲辦毋任一名漏網○派內閣學士殷兆鏞知武舉以都察院左副都御史賀壽慈為武會試正考官翰林院侍講學士夏同善為副考官○丙子諭內閣吳昌壽奏訪察屬員賢否分別保劾一摺河南浙川廳撫民同知高俸歷任繁區均有惠政著開缺以知府留於河南遇缺卽補遂平縣知縣文玉到任未久民愛滋深著俟補同知後以知府用前署魯山縣知縣楊宗頤悃愾無華循聲卓著著免補本班以直隸州知州補用署孟津縣知縣趙祐熙守潔才優輿情愛戴著

歸候補班儘先補用候補直隸州州同吳世銓才識兼長為佐貳中不可多得之員著免補州同以知縣遇缺卽補其西華縣知縣徐炳剛愎自用貪酷妄行商水縣知縣聯魁昏憤無知溺情廢事汝陽縣知縣蘊琛好尚虛浮政事廢弛永甯縣知縣周爾堯任性妄為聲名狼藉截取知縣徐銘廉於前署偃師縣任內任信差役罔利營私均著卽行革職南召縣知縣彭繩祖年近七旬精力衰憊前署新安縣知縣李瑞椿兩耳重聽志氣昏惰均著勒令休致前署登封縣知縣牛緒儒聲名平常辦事竭蹶著以府經歷降補以示勸懲而肅吏治○又諭劉蓉奏雷正綰營兵勇潰變現在辦理情形一摺

雷正綰一軍由鄂入陝。疊著戰功。轉戰而西。在甘肅地方。屢次摧堅破敵。克復城寨甚多。前因金積堡勦賊失利。當將該署提督革去幫辦。用示薄懲。該營將弁。自宜愧勵。交加立功自效。茲據劉蓉奏稱。該營部將胡大貴等。竟敢因師挫糧缺。誹瀆滋事。迫脅兵勇。在固原一帶。肆行殺掠。圍逼涇州。經提督周顯承等。率同在城文武。登陴守禦。將謀為內應之副將何成蛟。正法。並將逆黨匡文武等。誘擒。被脅兵勇。復經周顯承等。諭以大義。招撫解散。胡大貴等。知眾心不附。相率遁去。雷正綰親至涇州。曉諭兵勇。誓死與賊決戰等語。雷正綰於所部將士。謀變。未能即時懲辦。本有應得之咎。惟念該提督

平日打仗奮勉。勞績卓著。著從寬免其置議。此係朝廷破格恩施。該署提督宜知感知愧。倍加策勵。以贖前愆。記名提督胡大貴。副將雷恆。李高啟。乘機倡亂。實屬罪不容誅。均著卽行革職。緝拏正法。以昭炯戒。○諭軍機大臣等。前據文祥奏。籌勦馬賊。務使淨絕根株。一摺。當經諭令思合等。妥籌覆奏。嗣據思合。富平。阿麒麟。慶阿克敦。布廉。至。劉長佑等。先後奏到。各抒所見。均與文祥所奏大略相同。茲據軍機大臣恭親王等奏。各路備調官兵。坐鎮彈壓。不必輕動。責成地方官。飭差按拏。請飭各將軍等。轉飭所屬。曉諭居民。無生疑懼。馬賊中有悔罪自新者。酌予獎賞。嚴定州縣諱盜及鄰封協緝不力。

處分文武獲盜官員。應請酌覈議獎。請催盛京等處揀派官軍各等語。所籌均屬周密。所有盛京直隸吉林熱河等處。各豫派出官兵及備調兵。專為勦賊之用。如該匪伏而不動。但宜坐鎮彈壓。不准騷擾良民。仍責成地方官飭差役按拏匪首。不准稍涉聲張。妄拏無辜。著恩合等曉諭居民。照舊安居。無生疑懼。如有兵役騷擾。立按軍法懲辦。州縣失察。嚴行叅處。務期法在必行。不得徒託諭告具文。馬賊中有悔罪自新者。均准照所奏章程。按其獲盜名數。分別獎賞。均著按照恭親王等原奏章程。於告示內詳細逐層聲敘。明晰俾家喻戶曉。互相勸勉。地方盜案。限三日申報。仍照舊例立限開叅。毋

庸照新章嚴處。如獲有鄰境盜案。准其抵免處分。儻諱匿不報。卽查明叅革。從重治罪。該上司有徇隱不報者。一併治罪。鄰封協緝不力。著各該管上司從嚴叅辦。兵役通盜。知而不首者。訊明後。卽將該兵役斬梟示儆。如拏獲馬賊。係著名巨盜。及斬梟盜犯多名。准酌給翎支升階。破格獎勵。並著吏部兵部。將地方官拏獲本境鄰境盜犯。應如何將功抵過。及破格獎勵之處。酌定獲盜名數。分別覈議。先行奏定章程。候旨遵辦。此次劉長佑阿克敦布廉至等。調撥各兵。或擇要扼擊。或勤操備調。均著遵照前奉諭旨。雇覓眼綫。會同捕勦。不得稍涉鬆懈。所需口糧。寬為籌備。如有不敷。據實奏聞。未可吝

惜小費致誤大局。其關內外扼要處所向有額設官兵。著卽給與全餉。令於無事時隨時操演。不得有缺額雇替等弊。恩合、卓保、麒麟等所派官兵。未據奏到。著卽挑選得力兵弁。迅速具奏。毋稍玩延。其蒙古官兵。並著知照伯彥訥謨祜一體照辦。劉長佑查勘邊牆。已否周歷。應如何擇要設防。並趕緊興修之處。著據實具奏。阿克敦布等所籌會哨日期。及整頓卡倫之處。均著照辦。惟當實力奉行。毋得空言塞責。順天府所轄地方。萬青藝、下寶第。已團練馬勇。力行保甲。著嚴飭所屬認真辦理。軍機大臣片一件。均著鈔給閱看。文祥前奏。賊誨盜各情一摺。與恩合、麒麟等所陳整頓吏治武備摺。大

略相同。並著鈔給恩合等閱看。該署將軍等當各就地方情形。隨時整頓。以清盜源。而肅吏治。將此由四百里各諭令知之。○又諭。德興阿、劉蓉奏甘回大股圖犯陝疆。請分撥馬步各軍截勦。雷營潰勇。偪涇搶掠。經守城文武懲辦。撫輯事變。稍定。逆回仍撲涇州各摺。雷正綰部將胡大貴等乘機生變。經該署提督涕泣開導。不肯聽從。時回首赫明堂、穆三、楊大娃子率大隊回眾。由固原前來。胡大貴等俱與合併。雷正綰未能申明紀律。約束各營。致令所部釀成事端。聚眾戕官。將固原塵市搶掠一空。並劫奪餉銀軍火等項。該署提督統率無方。咎有應得。姑念雷正綰由陝入甘。轉戰而前。素稱勇敢。

兼之糧餉缺乏。備歷艱辛。自應寬其既往。俾得以功抵過。該署提督如能將為首倡亂之胡大貴等。立即擒斬。並曉諭赫明堂。穆三。楊大娃子。速戢邪心。使就馴服。仍當破格施恩。以示朝廷終始成全之至意。如赫明堂等不服開導。亦惟責成雷正綰。重整部伍。痛加勦洗。務將此股叛回。迅速殄除。想雷正綰受國厚恩。定當深自愧奮。勇往圖功也。赫明堂等現各帶馬賊千餘名。由鎮原甯州崇信三路圖竄陝疆。靈州逆回馬化澄。又率馬步賊各萬餘。由鎮原至涇州之北原。圖分南北兩路。直犯陝西。逆回與潰勇狼狽為奸。係屬意中之事。應如何杜其勾結。分路勦辦之處。著都興阿。穆圖善。楊岳斌。楊

能格。相度機宜。妥為籌辦。德興阿等請飭穆圖善赴陝援勦。陝省西路邊防甚形喫重。本省兵力不敷分布。著穆圖善迅即帶領所部馬隊親兵。督同金順。西蒙克。西克兩軍。繞由延鄜。馳赴邠長。協勦以資厚集。毋稍遷延。穆圖善所帶步軍。除衛隊親兵二百名外。其餘各營。仍留甯夏。併歸都興阿統轄。調遣如該回逆已入陝境。著楊岳斌。迅派曹克忠。統率所部馬步。由鹽茶徑趨平涇。跟蹤躡勦。德興阿。劉蓉。仍當就現有兵力。速籌堵禦。前後夾擊。毋得徒事防守。方為妥善。另片奏周達武所部十五營。規勦松潘。該處九月。即已大雪封山。來歲春融。方可進勦。置勁兵於無益之地。亦殊可惜。請飭周達

武赴甘。川省另派妥員赴楚募勇。明年二月可抵松潘。一轉移閒。於軍務較有裨益等語。前有旨令李輝武帶步隊五營。隨同趙長齡由川赴陝。此次雷營部勇潰亂。回匪更肆。鴟張甘省東路。及陝省之西南路。並無勁軍抵禦。周達武所部十五營。能否抽撥赴甘之處。著崇實、駱秉章酌度情形。妥為辦理。另片奏陶營潰勇。圖由興商竄回湖北。已諭知官文等派兵防勦。其鳳縣另股潰勇。就撫者尚有二千七百餘人之多。雖經派兵押送出境。難保不沿途滋事。著德興、阿、劉蓉、飛咨該潰勇原籍及經過地方。一體防範。毋稍疏虞。將此由六百里諭知都興、阿、穆圖、善崇實、駱秉章、楊岳斌、德興、阿、劉蓉。並

傳諭楊能格、雷正綰知之。○又諭劉蓉奏陶茂林營潰勇分股竄入陝疆。並據獲賊供稱。叛勇多籍湖北、江南、河南各省。有由興商急竄湖北之說等語。此起叛卒。由甘竄入陝境。不服開導。屢次抗拒官軍。且圖回竄鄂疆。蓄謀甚狡。劉蓉現飭駐紮商南之劉厚基一軍。扼要截擊。並檄興漢兩鎮及甯陝廳派集兵團。併力兜勦。著官文、鄭敦謹迅即選派得力將弁督帶兵勇。馳赴興商一帶。與陝軍會合勦辦。毋任擾及鄂陝交界。致與豫省捻逆勾結。益形滋蔓。並著官文飛咨江南、河南各督撫。於此項潰勇回籍時。均須一體嚴為防範。妥為安插。毋任復滋事端。將此由五百里各諭令知之。○又諭德興

賞錄卷五十四  
世  
阿○劉蓉奏請飭晉豫運解硫磺等語。豫省之彰衛懷三府。晉省之太原府一帶。向產硫磺。即著吳昌壽。王榕吉。自本年九月起。每月各辦硫磺五千斤。運解陝省。以資配造。毋稍遲延。將此由五百里諭知吳昌壽。並傳諭王榕吉知之。○署河東河道總督張之萬。奏報秋汛安瀾。命詣

河神廟祀謝。賞還張之萬二品頂帶。實授河東河道總督。○陝西巡撫劉蓉奏。請以周達武補固原提督。得旨。雷正綰並未開提督缺。現既深知愧悔。惟宜曲示羈縻。以觀後效。所請著毋庸議。○以甘肅固原勦辦潰勇出力。賞提督周顯承。譚玉龍。一品封典。並賞周顯承白玉翎管一支。白玉搬指一箇。

大荷包一對。小荷包二箇。火鐮一件。餘加銜升敘。開復有差。

○以陝西攻克八里坪等處賊寨出力。賞總兵官伍浦雲。副將鄧光升。劉求益。黃照臨。蕭楚光。陳義彰。都司孟學文。巴圖魯名號。參將蕭呈祥等花翎千總張映斗等藍翎。餘加銜升敘有差。○予陝西軍營病故總兵官李萃林。祭葬卹廕加等。

○予陝西寶雞陣亡遊擊蕭積玉。祭葬世職加等。○予廣東南海等處陣亡殉難在籍知縣李景新等紳民婦女三千四百八十三員名口。分別旌卹如例。○向到河南情實罪犯。停決斬犯九人。絞犯二人。餘八十八人。予勾。○丁丑。諭內閣。兵部等部。奏。遵議將軍等處分一摺。前任盛京將軍玉明等。於

寶鑑卷一百四十四  
十四  
馬賊肆行滋擾。平時既疏於防範。臨時又未能督飭弁兵。實力勦捕。任賊遠颺。捕務實屬廢弛。前任盛京將軍玉明。前任奉天府府尹德椿。均著降三級調用。玉明。德椿業已另案革職。應得降調處分。著照例註冊。兼管奉天府府尹盛京戶部侍郎寶珣。到任雖在馬賊滋擾之後。惟並未將地方被擾情形。據實陳奏。跡近徇隱。著照部議降一級調用。毋庸查級紀議。抵○諭軍機大臣等。阿勒楚喀副都統德著。本日已有旨。令其署理吉林將軍。迅赴新任。阜保。侯德英。抵任後。卽行交卸。仍遵前旨。馳赴喀爾喀。巴爾虎。辦理爭界事宜。惟瞬屆嚴冬。如該處大雪封山。不能前往履勘。卽著先行回京。將此諭

令知之。○又諭左宗棠等。奏官軍克復鎮平。追勦竄賊。大獲勝仗一摺。與瑞麟。郭嵩燾前奏大略相同。汪逆負固鎮平。經康國器。高連陞等督軍援勦。直薄城下。汪逆開西門逃竄。復經高連陞等追勦。斃賊甚多。該逆現由石正。龍虎墟一帶。分路竄走。如江粵各軍。能嚴扼其前。閩軍能緊躡其後。自可漸就殄除。著左宗棠卽飭入粵各軍。跟蹤追勦。不可稍涉鬆勁。劉坤一卽飭婁雲慶。席寶田等軍。迎頭截擊。毋任闖入江境。如由廣東興甯。和平竄至南雄。將來終恐為江西湖北邊患。著瑞麟。郭嵩燾督飭方耀等軍。認真截勦。如有趨南雄信息。左宗棠飭劉典一軍。由武平出江西安遠。信豐。急趨南安。兼

顧湖南邊境。該督撫等總宜通力合作。將此股逆眾勦盡。毋留遺孽。致貽後患。另片奏鮑超一軍。應由該提督自為主持。等語。前因粵省賊勢漸衰。已有旨令鮑超募勇成軍。後帶赴楚豫交界。勦辦張總愚股匪。仍歸曾國藩節制。婁雲慶軍。本係鮑超舊部。仍准該提督酌量檄調。著左宗棠傳知該員。懍遵前旨。赴裕州泌陽地方勦賊。如汪逆一股辦竣。並著飭令婁雲慶一軍。亦赴南裕一帶。交鮑超調遣。以資得加。又奏。前興泉永道曾憲德。熟習地方情形。人甚明幹。請令仍署興泉永道。並請將曾憲德。仍以道員留福建補用等片。均著照所請行。惟曾憲德一員。二年間由左宗棠於年終密考摺內稱。

其前在延建邵道任內。辦事諸多諉卸。才識均庸。是以有開缺送部引見之旨。此次復據該督保奏。何以該員一人之身。先後異轍如此。著查明覆奏。將此由六百里各諭令知之。○又諭。張凱嵩奏。南甯賊勢已窮。官軍分擊疊勝。現募新軍赴營協勦一摺。逆首孫荏。廣盤踞南甯府屬之那檀山澤兩巢。經張凱嵩督飭劉培一馳往督勦。分軍環攻。連日疊有擒斬。並將那檀賊巢頭柵攻拔。羣賊猶憑高恃險。悉力抗拒。官軍逐日挑戰。該逆閉柵不出。山澤之賊。並於施大路村築壘相持。是逆眾雖被勦窮蹙。仍糾黨負嵎。思逞困獸猶鬪之狡計。現在覃遠。璉將貴縣平塘一帶。踞匪勦除。率所募春字等營。

實錄卷一百五十四  
十  
馳赴永瀉協勦官軍兵力已厚。著張凱嵩嚴檄劉培一覃遠  
璉等軍。迅卽合力進攻。務將那檀山澤踞逆悉數殄除。該撫  
因新募楚勇。九月初始能到粵。擬俟屆期出省督勦。著於湘  
勇到齊卽行相度機宜。前往督辦。並嚴檄諸軍剋期蒞事。以  
靖邊陲。將此由五百里諭令知之。○漕運總督吳崇奏報揚  
河等工霜汛安瀾。命詣

風伯

河神廟祀謝。○盛京將軍恩合等奏。暫撤東邊卡倫官兵。擇  
要駐紮。得旨。據奏那移坐卡官兵。裁撤守兵各節。均中竅要。  
著准其照辦。惟當嚴飭該城守尉。實力督率認真巡緝。不可

有名無實。○錦州副都統慶春奏。拏獲馬賊夥犯楊得才。應  
否解京審訊。請旨遵行。得旨。楊得才著卽正法。嗣後緝獲交  
拏單開賊犯均著就地正法。毋庸請旨。○閩浙總督左宗棠  
奏。遵查侍逆李侍賢敗潰後。投入康逆汪海洋夥內。已於七  
月初三日夜。為汪海洋所殺。報聞。○護山西巡撫王榕吉奏。  
陝甘軍務未鬆。現擬添兵防堵。得旨。所籌晉省須添兵三千。  
卽著照辦。糧餉自應由晉籌措。而晉省應行協濟他省之款。  
仍須竭力協濟。不得因此藉口。致有短絀。○以阿勒楚喀副  
都統德英署吉林將軍。○以廣東澄海縣捐貲募勇。永廣學  
額二名。○以江蘇浙江克復常州嘉興等城出力。賞提督曹

仁美。滕嗣武。張元龍。正一品封典。總兵官熊兆周。周壽昌。從一品封典。總兵官唐鳴盛。副將魏興發。王得勝。李華相。許先傳。黃金志。馮作霖。楊萬謝。世彩。蔣秀元。葉興發。王正枝。羅時富。王興志。譚鴻聲。李永祥。龍義和。黃國珍。易其祥。參將張海龍。鄧金楚。何明廣。譚宏亮。張彪。劉藻廷。許開貴。遊擊尹德明。洪安富。都司鄧升。巴圖魯名號。總兵官陳飛熊。道員王大經。等花翎。通判湯建中。等藍翎。餘加銜升敘。開復有差。○以勸捐出力。予廣東在籍知府李應棠。以道員用。並加鹽運使銜。○予廣東鎮平陣亡守備李如祭。葬世職加等。○戊寅。諭內閣。前因大理寺少卿于凌辰。御史張觀鈞。佛爾國春。台斐音。

等。各奏盜墓賊犯。請加等治罪。當經先後降旨。交刑部都察院大理寺覈議具奏。茲據刑部等衙門覆奏。請嗣後發掘常人墳冢。開棺見屍。為首者從重擬斬立決。為從者俱絞監候。其鋸縫鑿孔。抽取衣飾。雖未顯露屍身。亦應從重。將為首之犯。不論次數。擬絞立決。為從者絞監候。其發掘有關名分等項墳冢。分別從重加梟。如有拋棄屍骨。及將控告人殺死者。照強盜得財本律。不分首從。皆斬。所擬尚為允當。均著照擬辦理。近來盜墓之案。層見疊出。殃及枯骸。情殊殘忍。所有已獲未結各犯。均著照此次新定章程。問擬以儆兇頑。而昭炯戒。○諭軍機大臣等。李鶴年奏。逆匪竄擾東明縣城。擾及河。

岸現飭各軍加意堵扼一摺逆匪竄至東明城西由隄口入撲城垣並有賊匪二三百騎竄及長垣縣之竹林渡口經東明縣在城兵勇並龔文林礮船分路擊退該逆仍順河下竄東省曹屬一帶現為逆匪麇聚之區與直境毗連易致竄擾且賊蹤飄忽異常難保不去而復返亟須調撥兵隊妥籌守禦著劉長佑李鶴年迅飭余承恩范梁蔣春元等派撥勇隊馳赴東明協同守禦一有警報卽分派北岸防兵渡河夾擊以資應援其沿河各渡口並著劉長佑等飛檄龔文林等督帶礮船嚴密梭巡遇有賊蹤竄至立即會合各軍及河岸紳團實力兜截毋任闖入直境將此由四百里諭知劉長佑並

傳諭李鶴年知之○又諭豐陞額奏請飭催餉銀以資接濟一摺據稱滄州駐防官兵例得俸餉積欠已四載有奇本年自春至秋僅發過七折八成兵餉計銀不足一季而俸餉給發無期甚形苦累自係實在情形該處為山東入津要路操防緊要轉瞬隆冬巡查尤須嚴密若令該官兵等枵腹荷戈殊不足以示體恤著劉長佑督飭該藩司迅速籌款按數撥解毋稍玩延將此諭令知之○兵部以武會試中額請得旨滿洲蒙古取中二名漢軍取中三名奉天取中一名直隸取中十五名陝甘取中一名廣東取中十名河南取中七名山東取中八名山西取中七名湖北取中三名湖南取中六名

四川取中八名。廣西取中二名。福建取中二名。浙江取中一名。江西取中三名。雲南取中一名。○以兵部右侍郎伊精阿兼署戶部左侍郎管三庫事。內閣學士伍忠阿署刑部左侍郎。○調理藩院右侍郎額勒和布為盛京戶部侍郎兼管奉天府府尹事。○予廣東番禺殉難民婦曾陳氏、黎梁氏、旌卹如例。○已卯。

上奉

慈安皇太后

慈禧皇太后啟鑾恭謁

東陵。○至朝陽門外詣

東嶽廟拈香。○詣

慈安皇太后

慈禧皇太后行宮問安。至還宮皆如之。○諭內閣直隸提督徐廷楷著加恩賞還頂帶。○諭軍機大臣等劉坤一奏賊匪竄入江境疊擊獲勝現經出省勦辦情形一摺汪逆大股由鎮平竄出盤踞羅浮司繞入江西長甯縣之簧鄉鋪經周寬世等分路迎擊獲勝賊蹤改竄定南復經婁雲慶等擊敗現由定南竄撲龍南勢尚鴟張劉坤一已帶親兵馳往贛州督勦即著督飭將士迅籌埽蕩毋令闖入江西腹地左宗棠有節制三省之責務當派兵越境夾擊不可稍涉延緩鎮平一帶

實錄卷一百五十四  
是否尚有餘匪。並著瑞麟、郭嵩壽實力搜捕。毋留餘孽。南韶一帶兼須嚴防回竄。賊蹤飄忽異常。恐其西竄湘省。著劉坤一飛速咨照李瀚章一體嚴防。其出力之將弁。准其併案保奏。將此由六百里各諭令知之。○以內閣學士英元為理藩院右侍郎。○調鑲紅旗蒙古副都統恆祺為鑲白旗滿洲副都統。以內閣學士延煦兼鑲紅旗蒙古副都統。魁齡署鑲黃旗漢軍副都統。○予江西長甯陣亡都司陳慶福、謝登科、把總瞿明東等祭葬。世職加等。○是日駐蹕煙郊行宮。○庚辰諭軍機大臣等。明緒奏伊犁軍情危急。請飭催迅解餉需。並請催關內援兵各摺片。武隆額奏督兵圍攻賊巢。追擊哈薩

克情形。暨請調烏科二城蒙兵助剿。各一摺。伊犁軍情危急。待餉孔殷。各省協餉。由綏遠城轉解烏科二城者。已不下數十萬兩。何以迄今尚未解到。分釐實屬畛域太分。不顧邊疆之急。著明誼、麟興、車林敦多布、廣鳳奎、昌將已到伊犁餉銀儘數運解。不准稍有遲誤。如大路尚不能通。即懍遵疊次諭旨。迅派妥員設立臺站。多備駝馬。由俄國邊界趕緊運赴。伊城以救眉急。嗣後續到餉銀。並著隨到隨解。毋得稽延干咎。其各城量撥之款。亦著明誼等一併迅速催解。以專責成。儻敢再有遲逾。致邊陲大局。或至決裂。必將明誼等從重治罪。聯捷等軍已疊次諭令。剋日出關。明緒於援兵未到之先。當

就現有兵力妥籌守禦。以副委任。明誼等截留之三萬兩餉銀。前已飭令仍解伊犁。卽著明緒派員迎提。以濟要需。塔城金頂寺回匪拒守甚固。經武隆額督兵攻擊。疊次獲勝。轉世喇嘛棍噶札勒參帶領蒙兵追勦哈薩克。進攻寺內匪眾。並屢次擊敗哈薩克大股馬賊。窮追出卡。俾回匪無從勾結。實屬異常奮勇。其應如何給予優獎之處。著理藩院速行議奏。哈薩克匪眾雖被勦潰散。難保不去而復來。塔城勢急。兵單。亟宜鄰境撥兵援應。著明誼麟興車林敦多布廣鳳奎昌各於烏科兩城所屬蒙古兵內酌派精壯各一千名。配帶器械軍火。星速兼程馳往會勦。並著廣鳳奎昌將科城存倉糧石

內撥借小麥五千石。支給隨征官兵。解運赴塔。毋得稍分畛域。致誤事機。將此由六百里各諭令知之。○塔爾巴哈台參贊大臣武隆額奏擬借俄國官兵火礮助勦。得旨。前因明緒奏請借用俄兵一節。迄無成議。已作罷論。茲據武隆額奏稱。已行文俄國借用兵丁銅礮。著該參贊大臣相機籌辦。總期有利無弊。方為妥善。○是日駐蹕白澗行宮。○辛巳。

上詣

獨樂寺拈香。至隆福寺更衣幄次。御素服。冠摘纓緯。詣

文宗顯皇帝

孝德顯皇后梓宮前。行叩謁禮。哭踊無算。哀動左右。至燎所奠

酒王以下文武大臣均隨行禮。○申刻復詣

梓宮前行夕奠禮。○以大葬

定陵。前期三日遣官告祭

天

地

太廟

社稷。○賞請轎鑾儀衛校尉銀。○賞看守煙郊等處行宮弁兵

半月錢糧。○是日駐蹕隆福寺行宮。至甲申皆如之。○壬午

上詣

文宗顯皇帝

孝德顯皇后梓宮前行奉移祇告禮。奠獻擗踊哀慟。卯刻跪送

梓宮奉移至隆福寺宮門外。升大舉啟行。

上步從里許。哭不停聲。由閒道先至

定陵。閱視明樓。酉刻

梓宮至大紅門外。孚郡王奕諲遙向

祖陵。恭代行祇謁禮。

梓宮自大舉升小舉

上跪候換昇。恭導

梓宮入

隆恩門。奉安於

隆恩殿奠酒舉哀行禮○以

文宗顯皇帝

孝德顯皇后梓宮至

陵遣官告祭

昭西陵

孝陵

孝東陵

景陵

裕陵○賞恭請

大輦小輦民夫銀

大清穆宗繼天開運受中居正保大定功聖智誠孝信敏恭寬  
毅皇帝實錄卷之一百五十四



